

PROMOCIJA INFORMACIJSKE PISMENOSTI¹

PROMOTION OF INFORMATION LITERACY²

Sažetak

Tekst je osvrt na IX međunarodno savjetovanje bibliotekara „Juni na Uni“, održano 8. i 9. juna 2012. godine u Bihaću, Bosna i Hercegovina.

Summary

The text is a review of the 9th International Librarians' Conference „June on Una River“ held on 8th and 9th of June 2012 in Bihać, Bosnia and Herzegovina.

U Bihaću je 8. i 9. juna 2012. godine održano IX međunarodno savjetovanje bibliotekara „Juni na Uni“, čiji su organizatori i suorganizatori bili JU Kantonalna i univerzitetska biblioteka Bihać, Univerzitet u Bihaću, Limerick Institute of Technology, Republic of Ireland (Tempus projekat 517117 koordinator), Vlada Unsko-sanskog kantona, Općina Bihać te Nacionalna i univerzitetska biblioteka Bosne i Hercegovine. IX međunarodno savjetovanje bibliotekara „Juni na Uni“ bilo je posvećeno konceptu informacijske pismenosti i s njim u kauzalnoj vezi povezanom konceptu cjelovitog učenja.

Spomenuto je savjetovanje imalo za temeljne ciljeve istražiti postojeće stanje u pogledu izučavanja informacijske pismenosti u Bosni i Hercegovini te regionu, akcentirati razmjenu iskustava u tom smislu te propitati mogućnosti unapređenja i promocije ovih neprijeporno važnih koncepata savremenog informacijskog okruženja. Sa spomenutim ciljevima u

¹ Tekst je osvrt na IX međunarodno savjetovanje bibliotekara „Juni na Uni“, održano 8. i 9. juna 2012. godine u Bihaću, Bosna i Hercegovina.

² The text is a review of The 9th International Librarians' Conference „June on Una River“ held on 8th and 9th of June 2012 in Bihać, Bosnia and Herzegovina.

vezi atraktivni referati prezentirani na Savjetovanju upoznali su posjetioce i izlagače sa konkretnim pokušajima realizacije programa informacijske pismenosti u bibliotekama, upozorili na ulogu koju biblioteke i bibliotekari imaju u strukturiranju i realizaciji programa informacijske pismenosti, podsjetili na napore međunarodnih organizacija u promovisanju značaja informacijske pismenosti i cjeloživotnog učenja te akcentirali potrebu uključivanja sadržaja informacijske pismenosti u nastavne planove i programe svih nivoa obrazovanja.

Predstavnici Limerick Institute of Technology, koji je koordinator Tempus projekta 517117 „Razvoj informacijske pismenosti za cjeloživotno učenje i ekonomiju zasnovanu na znanju u zemljama Zapadnog Balkana“, kroz zapaženo izlaganje predstavili su ovaj projekt i istakli koliko je važna njegova implementacija u Bosni i Hercegovini i zemljama Zapadnog Balkana.

Predstavnik iz Slovenije je prezentirao rad pod naslovom „COBISS – podrška cjeloživotnom učenju“ i demonstrirao na primjeru COBISS-ovog obrazovnog programa kako je dostizanje ciljeva cjeloživotnog učenja puno lakše uz podršku jedinstvenog bibliotečkog sistema.

Domaćini Savjetovanja, predstavnici JU Kantonalna i univerzitetska biblioteka Bihać, referatom pod naslovom „Učešće i uloga Univerziteta u Bihaću u Tempus projektu 517117 – informacijska pismenost i ekonomija znanja u zemljama zapadnog Balkana“ upoznali su prisutne sa naporima Univerziteta u Bihaću usmjerenim ka unapređenju i promociji informacijske pismenosti.

„Uloga knjižnica u informacijskoj pismenosti“ je bio naslov izlaganja predstavnica Hrvatske, koje su podsjetile na međunarodno relevantne bibliotečke standarde koje biblioteke tumače kao javne ustanove s obrazovnom, kulturnom ali i informacijskom ulogom.

Predstavnik iz Srbije je imao izlaganje pod naslovom „Sekularni sadržaji fondova biblioteka verskih institucija, primer medicinske literature prve polovine XIX veka u Biblioteci Srpske Patrijaršije“, a predstavnik Narodne biblioteke iz Bijelog Polja, Crna Gora, prisutnima je prezentirao rad „Informacijska pismenost korisnika Narodne biblioteke u Bijelom Polju – istraživanje i perspektive“ i upozorio na neophodnost uključivanja programa informacijske pismenosti u obrazovni sistem.

Predstavnica Biblioteke i dokumentacionog centra Komisije za očuvanje nacionalnih spomenika iz Sarajeva prezentirala je rad „Društvo znanja – potreba za cjeloživotnim učenjem“ i podsjetila da je BiH potpisnica

više međunarodnih ugovora i konvencija prema kojima je preuzela obaveze iz oblasti cjelovitnog učenja.

Kroz zapaženo izlaganje predstavnica Univerziteta u Sarajevu pod naslovom „Informacijska pismenost i fakulteti / akademije Univerziteta u Sarajevu“ prisutni su upoznati sa istraživanjem o aktuelnom stanju u pogledu izučavanja informacijske pismenosti na fakultetima i akademijama Univerziteta u Sarajevu i o realizaciji programa informacijske pismenosti u visokoškolskim bibliotekama Univerziteta u Sarajevu.

Predstavnik Pedagoškog fakulteta Univerziteta u Zenici imao je izlaganje „Evaluacija priloga u naučnim časopisima“, a predstavnica Fakulteta za kriminalistiku, kriminologiju i sigurnosne studije Univerziteta u Sarajevu je svojim referatom „Promoviranje informacijske pismenosti i međunarodne organizacije“, između ostalog, podsjetila na najveće zablude s konceptom informacijske pismenosti u vezi i istakla kako je ova problematika akademskoj i stručnoj bh. zajednica nedovoljno atraktivna.

„Univerzitetska biblioteka i biblioteke Univerziteta u Prištini sa privremenim sedištem u Kosovskoj Mitrovici – informacijska pismenost“ bio je naslov izlaganja predstavnika Kosova po Rezoluciji UN VS 1244/99, koji je istakao kako očekuje da će se informacijska pismenost na Univerzitetu u Prištini unaprijediti kroz TEMPUS-ov projekt u kojem Univerzitet aktivno učestvuje.

Na kraju, iz Arhiva USK prezentiran je rad pod naslovom „Arhivski dokumenti kao izvor cjelovitnog učenja – iz iskustva Unsko-sanskog kantona“, kojim se prisutne upoznalo sa aktuelnim naporima Arhiva USK u promociji ideje cjelovitnog učenja.

S podsjećanjem da je problematika informacijske pismenosti u BiH zaokupila pažnju nevelikog broja istraživača, valja istaći da su korisni referati i plodne diskusije IX međunarodnog savjetovanje bibliotekara uveliko obogatili bosanskohercegovačku bibliotečku i širu zajednicu sa nedostajućim promišljanjima o ovim konceptima. U tom smislu, ohrabruje što referate velikog broja izlagača iz Bosne i Hercegovine, Irske, Albanije, Slovenije, Hrvatske, Srbije, Kosova po UNSC Rezoluciji 1244/99 i Crne Gore, JU Kantonalna i univerzitetska biblioteka Bihać planira objaviti u zborniku konferencijskih radova do kraja 2012. godine.